

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO SPORAZUMU O ZAJMU IZMEĐU BOSNE I
HERCEGOVINE I SVJETSKE BANKE - MEĐUNARODNE BANKE ZA OBNOVU I
RAZVOJ (IBRD) ZA PROJEKAT JAČANJA BANKARSKOG SEKTORA**

Sarajevo, juli 2017. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), Predstavnički dom Parlamenta Federacije Bosne i Hercegovine na ___ sjednici održanoj _____ i Dom naroda Parlamenta Federacije Bosne i Hercegovine na ___ sjednici održanoj _____ d o n o s i

ODLUKU

O PRIHVATANJU ZADUŽENJA PO SPORAZUMU O ZAJMU IZMEĐU BOSNE I HERCEGOVINE I SVJETSKE BANKE - MEĐUNARODNE BANKE ZA OBNOVU I RAZVOJ (IBRD) ZA PROJEKAT JAČANJA BANKARSKOG SEKTORA

I.

Prihvata se zaduženje Federacije Bosne i Hercegovine (u daljem tekstu: Federacija) po Sporazumu o zajmu (u daljem tekstu: Sporazum) između Bosne i Hercegovine (u daljem tekstu: BiH) i Svjetske banke - Međunarodne banke za obnovu i razvoj (u daljem tekstu: IBRD), u iznosu od 28.300.000,00 EUR što iznosi 50% od ukupno odobrenih sredstava za Bosnu i Hercegovinu koja iznose 56.600.000,00 EUR za Projekt jačanja bankarskog sektora.

II.

Sredstva zajma iz tačke I. ove Odluke namijenjena su za pružanje podrške vlastima na jačanju bankarskog sektora u zemlji na zdrav, stabilan i inkluzivan način. Projekt će to postići unapređenjem regulacije i nadzora nad bankama, rješavanjem slabosti bankarskog sektora, uspostavljanjem novog okvira restrukturiranja banaka i jačanjem upravljanja i poslovanja entitetskih Razvojnih banaka.

III.

Sredstva zajma iz tačke I. ove Odluke, odobravaju se Federaciji pod sljedećim uslovima:

- rok otplate (uključen grace period):.....32 godine
- grace period:.....7 godina
- početna naknada.....0,25 % godišnje
- naknada za održavanje zajma.....0,25% godišnje
- kamatna stopa:.....LIBOR (za euro) + varijabilni spread
- dospijeća:.....polugodišnja
- datumi plaćanja glavnice i kamata:15. maj i 15. novembar svake godine

IV.

Potvrđuje se da je razmatrana dokumentacija prihvatljiva za Federaciju, a posebno:

- Usaglašeni zapisnik s pregovora;
- Nacrt Sporazuma o zajmu između Bosne i Hercegovine i IBRD-a;
- Nacrt Projektnog sporazuma između IBRD-a i Federacije BiH;

- Nacrt Dokumenta o procjeni projekta.

V.

Daje se saglasnost za zaključivanje Supsidijarnog sporazuma između Bosne i Hercegovine i Federacije za sredstva iz tačke I. ove Odluke.

Za potpisivanje Supsidijarnog sporazuma ovlašćuje se federalni ministar finansija.

VI.

Za realizaciju ove Odluke i izvještavanje zadužuje se Federalno ministarstvo finansija.

VII.

Implementacija Sporazuma iz tačke I. ove Odluke, zahtijeva donošenje novih propisa koji uređuju bankarski sektor u Federaciji BiH uključujući i Razvojnu banku Federacije BiH.

VIII.

Ova Odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja Nacrta sporazuma o zajmu i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Osnovni razlog za donošenje ove Odluke je zaduženje Federacije Bosne i Hercegovine po osnovu Sporazuma o zajmu kod Svjetske banke - Međunarodne banke za obnovu i razvoj (IBRD) za pružanje podrške vlastima na jačanju bankarskog sektora u zemlji na zdrav, stabilan i inkluzivan način. Projekt će to postići unapređenjem regulacije i nadzora nad bankama, rješavanjem slabosti bankarskog sektora, uspostavljanjem novog okvira restrukturiranja banaka i jačanjem upravljanja i poslovanja entitetskih Razvojnih banaka.

Obrazloženje pojedinih tačaka

Tačka I. je nužna kako bi se prihvatilo zaduženje Bosne i Hercegovine kod Međunarodne banke za obnovu i razvoj (IBRD).

Tačkom II. potvrđuje se namjena utroška sredstava zajma.

Tačkom III. precizirani su uslovi zajma.

Tačkom IV. potvrđuje se da je dokumentacija parafirana u toku pregovora s Međunarodnom bankom za obnovu i razvoj (IBRD) prihvatljiva za Federaciju BiH, što je uslov da Bosna i Hercegovina i Međunarodna banka za obnovu i razvoj (IBRD) pristupe potpisivanju Sporazuma o zajmu.

Tačkom V. daje se saglasnost za potpisivanje Supsidijarnog sporazuma kao i ovlaštenje federalnom ministru finansija da u ime Federacije potpiše isti.

Tačkom VI. se za realizaciju ove Odluke zadužuje Federalno ministarstvo finansija.

Tačkom VII. potvrđuje da za implementaciju Sporazuma o finansiranju potrebno donijeti nove propise.

Tačka VIII. propisuje stupanje na snagu ove Odluke.